

李文忠公全書

奏稿

李忠節公奏議卷五

奏謝授安徽巡撫摺

光緒二十年五月二十二日

奏爲恭謝 天恩仰祈 聖鑒事竊臣恭閱邸鈔光緒二十年四

月二十一日內閣奉 上諭安徽巡撫著李秉衡補授等因欽此

當即恭設香案望 闕叩頭謝 恩伏念臣以凡庸之質蒙 特

達之知由牧令洊升廣西藩司護理巡撫因病籲請開缺頻年調

理尙未復元每念 恩知未能報稱瞻 九宸於咫尺常五夜以

徬徨豈期衰疾之餘生猶荷 聖明之垂注 擢從田里超領封

圻自顧何人忝膺非分即糜頂踵詎答涓埃感極涕零匪言可喻

竊維皖省地居衝要撫 臣任總軍民深虞多病之軀莫挽積頽之

李忠簡公奏請
卷五
俗惟既仰蒙 驅策但使勉能支拄何敢稍耽安逸自外 生成
惟有誓殫血誠力圖整頓以冀仰答 高厚慈施於萬一所有微
臣感激下忱謹繕摺叩謝 天恩伏乞 皇上聖鑒再臣現寄寓
直隸保定府屬之滿城縣此摺就近借用直隸藩司印信拜發合
併聲明謹 奏 光緒二十年五月 日奉 硃批知道了欽
此

奏請假一個月片

光緒二十年五月二十二日

再臣現蒙 特恩補授安徽巡撫應即趨叩 闕廷跪聆 訓誨
緣前在護理廣西巡撫任內歷年駐兵鎮南關感受瘴溼致骸足
痠軟不良於行向有吐血舊疾觸發增劇不得已疏請開缺仰荷

恩允從前久官直隸醫藥近便北歸後即寄寓滿城醫治多方
漸見痊可前年冬間復患血疾今春始愈而氣血因之虧損足力
尙覺不支合無籲懇 天恩賞假一個月俾得從速調攝練習筋
力一俟假滿步履稍健即當趲程赴京不敢少涉遲延謹附片陳
請伏乞 聖鑒訓示謹 奏 光緒二十年五月 日奉 硃
批著賞假一個月假滿後即行來京陛見欽此

奏報到任日期摺

光緒二十年八月十五日

奏爲恭報

微臣

到東接印任事日期叩謝

天恩仰祈

聖鑒事

竊臣前蒙

恩命簡放安徽巡撫入都

陛見旋於光緒二十年

七月十六日奉

上諭李秉衡著調補山東巡撫安徽巡撫著福

潤調補欽此當即趨詣 宮門先後仰蒙 召對三次 聖訓周
詳莫名欽感 陛辭後束裝起程道出天津晤北洋大臣大學士
直隸總督臣李鴻章會商海防事宜旋即趲程赴東於八月十二
日行抵山東省城十三日准調任撫臣福潤將山東巡撫關防臨
清關監督關防鹽政印信各一顆並 王命旗牌文卷書籍等件
委員齎送前來臣當即恭設香案望 闕叩頭謝 恩祇領任事
伏念臣衰病餘生渥承 寵眷受 恩愈重報稱愈難查山東地
接畿疆巡撫職司表率官常宜肅激濁乃以揚清民氣宜舒安良
必先除暴他如慎修守以弭河患籌兵餉以重海防以及關榷鹽
漕事事悉關緊要材輕任重懼弗克勝惟有破除情面殫竭愚忱

以期仰答 高厚鴻慈於萬一除循例恭疏 題報外所有 微臣

接印任事日期並感激下忱謹繕摺叩謝 天恩伏乞 皇上聖

鑒謹 奏 光緒二十年九月 日奉 硃批知道了即著將

應辦一切事宜認真整頓刻下海口防務及曹州一帶盜匪尤應
妥籌辦理毋稍大意欽此

奏請將曹州府知府毓賢暫緩引見摺 光緒二十年八月二十七日

奏爲山東省西盜匪充斥請將曹州府知府毓賢暫緩引 見責

成專辦兗沂曹三府盜賊添勇練團以清內患而裨防務恭摺仰

祈 聖鑒事竊維現在倭氛不靖海防是急然備外患必先清內

訌查山東曹兗沂數郡民氣素強近年萑苻嘯聚動輒結隊成股

李忠簡公奏議 卷五
劫掠焚殺儼同巨寇民不聊生若不趕緊捕治深恐貽患燎原於
海疆防務大有關係臣七月間在都 陛見時曾將所聞東省盜
賊情形及曹州府知府毓賢長於捕務據實面奏仰荷 聖明鑒
察比臣到東任事後復又悉心咨訪證諸省城司道及本管兗沂
曹濟道先後來稟咸稱現任曹州府知府毓賢疾惡愛民認真緝
捕盜賊畏之無如兵力無多即一府而論尙不免此拏彼竄臣與
司道等再三熟籌必須添勇練團將兗沂曹三府盜賊統歸該府
專辦方能有效該管道姚協贊來稟亦以爲請現擬飭令自行添
募勇隊五百名即歸該府統帶並將附近防營准其調遣責成旣
專該府必能盡力搜捕以靖地方一面分飭各屬舉辦團防村大

者三數村爲一團村小者十數村合爲一團妥定章程實力舉行
俾兵民聯絡爲一務使遺患不留庶內地可清而海防亦得一意
經營不至有牽掣之慮惟查該府毓賢前經調任撫臣福潤奏保
奉 旨送部引 見合無仰懇 天恩俯念東省盜風太熾緝捕
需人准令毓賢暫緩交卸專辦兗沂曹三府盜賊實於捕務防務
大有裨益至東省吏治亟應講求如官不久任局設太多冗員耗
費河工濫保種種錮習積之有漸惟有督同司道不避嫌怨次第
切實整頓藉資補救現將應辦事宜趕緊部署即當馳赴煙臺威
海一帶海口察巡防務隨時奏陳所有擬添勇練團懇將曹州府
知府暫緩送部引 見責成督捕盜賊緣由理合恭摺具 奏伏

乞 皇上聖鑒訓示謹 奏 光緒二十年九月十五日奉 硃批著照所請吏部知道欽此

奏裁併各局片 光緒二十年八月二十九日

再東省籌辦海防款無所出惟以裁併局員節省糜費爲目前第一要義臣甫經到任又須出省布置防務先擇局費太繁委員太冗者與司道等悉心參酌分別裁併除工程局停撤外如釐金土藥軍械併入善後爲一局賑撫賑捐併爲一局書局通志併爲一局均委藩司湯聘珍總辦保甲機器兩局均委臬司松林總辦南北兩運併爲一局派委運司李希蓮總辦洋務河營及河防局均委濟東泰武臨道張上達總辦概無薪水其會辦提調收支文案

必不可少者即於候補道府同通州縣中每局遴委數員分司其事酌給薪水餘俱裁撤核計每月經費節省頗鉅此外如有應因應革事宜容臣查明次第舉行謹先附片陳明伏乞 聖鑒謹奏

奏分別籌款免借商本摺

光緒二十年九月初一日

奏爲遵 旨分別籌款請免利借商本以濟餉需而尊國體恭摺覆陳仰祈 聖鑒事竊查接管卷內光緒二十年七月十八日承准軍機大臣字寄七月十四日奉 上諭現在倭氛不靖沿海籌防募勇練兵以籌餉爲最要各該督撫均有理財之責即著各就地方近日情形通盤籌畫何費可減何利可興何項可先行提存

何款可暫時挪借務須分籌的餉奏支海上用兵之需等因欽此
遵 旨寄信前來適前撫臣福潤調任卸事未及覆 奏移交到
臣正在籌議間又於八月十四日兵部遞到承准軍機大臣字寄
八月初九日奉 上諭現在倭氛不靖購船募勇需餉浩繁息借
商款京城業經創辦即著各直省督撫徧諭官紳商民人等如有
湊集資本情願借給官用者准赴藩司關道衙門呈明即照戶部
辦法議定行息填給印票其票鈐用藩司關道印信填明歸還本
利限期准於地丁關稅項下照數按期歸還如集款至一萬兩以
上准將籌集之人先行請獎虛銜封典以示鼓勵等因欽此伏查
倭夷渝盟擾我藩屬徵兵防勦需款浩繁凡在臣民莫不同仇敵

愼力圖報稱以抒其忠愛之忱惟款項固貴寬籌時勢尤宜熟審
總期餉需 國體兩無窒礙臣會集司道詳加商議咸謂連年水
患工賑頻仍用度日增征收日減錢漕則較多蠲緩鹽務則逐漸
滯銷銀礦煤窰商本時形虧累釐金土藥進款亦甚纖微而京協
固本邊防各餉鐵路內務府直隸東明河工及本省兵餉勇糧賑
撫機器各局黃運兩河工程等項經費支解紛繁已形竭蹶且海
防同一戒嚴召募勇營添辦軍火在在均關緊要又須籌備大宗
無非設法騰挪此則利無可興費無可減通盤籌畫深費躊躇至
若息借商本藉補餉糈在部臣百計經營爲此權宜之舉苦心孤
詣薄海同知臣仰荷 殊恩忝膺疆寄正值海氛未靖時事多艱

應如何殫竭愚誠實力勸辦上紓 聖主宵旰之憂無如東省地瘠民貧本鮮巨富溯自黃流穿運以來南北帆檣久難暢行因而大賈巨商遠莫能致其在本省貿易者以鹽當票號爲最大鹽商已令專款報効當商另奉 諭旨派捐票號一項又准戶部咨行業經在京出借鉅款若外省再行勸借商力實有未逮此外小本營生十居八九旣非厚貲坐擁稱貸實難必其樂從縱勸導多方終恐小數零星無裨正用即如近來賑捐勢成弩末商民窮乏是其明徵夫假以名器尙多裹足不前矧此利借之銀出入俱經官手懷疑生畏更不待言微特無補餉需更恐有關 國體此利借商本之格礙良多也顧時雖處於至難款當先其所急不得已與

司道等再四熟籌於無可設措之中爲勉力羅掘之計糧道關道
運司各庫額解之外均無閒款可提鹽釐兩次加捐商力已疲礙
難再令預繳祇可於藩庫內逐款搜括積銖累寸湊集銀十萬兩
作爲的款候撥復經運司敦勸鹽商激其義憤僉云渥沐 恩膏
極思圖報情願攤捐一次銀十萬兩自光緒二十一年起分作四
年隨同引票繳足在該商急公奉上雖據聲稱不敢仰邀議敘究
未便沒其微忱容由 臣另行請獎以示鼓勵第捐項年限較遠一
時不克繳齊先由司道各庫局如數籌墊按年撥還猶恐集款未
鉅不足以資接濟復於各庫局中無論是何款項亦不計能否動
用暫行湊挪銀十萬兩移緩就急隨時彌補連前鹽捐合銀二十

萬兩作爲另款候撥以上的款另款共計銀三十萬兩臣到任甫及半月尙未熟悉情形幸賴藩司湯聘珍運司李希蓮濟東泰武臨道張上達共矢公忠羣策羣力得以籌此鉅款實爲臣初念所不及然已搜羅殆盡不遺餘力矣抑臣更有請者此次變通辦理無所謂借即無所謂還無所謂本更無所謂利東省財力本絀當智盡能索之餘不得不爲此竭澤而漁之舉在各疆臣目擊時艱當均能勉力籌謀共圖補救如此則地丁關稅仍歸 朝廷正供不特餉需可濟又可一泯還借之迹 國體亦愈尊矣所有遵旨分別籌款請免利借商本緣由理合恭摺覆陳是否有當伏乞

皇上聖鑒訓示謹 奏

奏查明御史所奏匪徒一節據實覆陳摺

光緒二十年九月二十一日

奏爲遵 旨據實覆陳仰祈 聖鑒事竊臣於九月初二日出省

籌辦海防前經 奏報在案初五日在臨淄縣途次承准軍機大

臣字寄光緒二十年八月二十七日奉 上諭御史齊蘭奏近聞

山東煙臺等處匪徒猖獗日甚係李洪一黨等因欽此遵即飛飭

登萊青道嚴密確查去後臣道出青州萊州登州各府復沿途查

訪茲於十八日行抵煙臺據登萊青道劉含芳稟稱煙臺一帶並

無匪徒蹤迹地方居民亦不知有李洪名目查光緒十七年江南

拏獲會匪訊供係李洪爲首其時上海申報謠傳該犯逃赴煙臺

天津一帶嗣經南洋大臣劉坤一仍在江南境內拏獲正法以後

南北各省未聞有餘黨滋事之說證以沿途官民所述大畧相同
委無乘隙滋擾情事原奏自係傳聞之訛惟煙臺五方雜處稽察
頗慮難周臣已檄飭該道轉飭各州縣舉辦團防無論城市鄉鎮
編立牌保互相稽查並於煙臺輪派練軍弁勇認真梭巡俾奸宄
無所託足仰副 聖主綏靖海疆至意至東省防務惟登州無險
可扼較費經營前撫臣福潤已派候補道李正榮管帶嵩武四營
又新募福字兩營駐紮該處臣留住兩日麤爲布置始詣煙臺煙
臺在登州東南一百六十里陝西漢中鎮總兵孫金彪所帶嵩武
四營駐焉該處爲各國通商口岸最爲緊要孫金彪謀勇兼優與
登萊青道劉含芳會商布置極爲周妥臣履勘礮臺均得地勢礮